

Nove droge u BiH prodaju se u obliku mirisnih štapića

Gojko Vasić, načelnik policije RS-a, kazao je novinarima Centra za istraživačko novinarstvo (CIN) da se nove droge, koje su jeftinije od uobičajenih, uglavnom prodaju preko interneta.

Međutim, dodaje da je policija nedavno dobila informaciju da je kriminalcima u RS-u ponuđena prodaja 100 kilograma novih vrsta droga. Ponuđeno je da se trgovina obavi na granici sa Hrvatskom.

Objašnjava da se na tržištu nalaze razne vrste droga koje vode porijeklo iz Kine, no policija nije uspjela zaplijeniti veće količine. Prema Vasićevom opisu neke od njih su prepoznatljive po egzotičnom mirisu koji daje bogatu aromu.

Siniša Kostrešević, načelnik Jedinice za organizovani kriminal MUP-a RS-a, rekao je da se mješavine pod nazivom „spice“ prodaju kao egzotični mirisi. Sumnja se da se proizvode u Kini i nastaju miješanjem sintetičkih kanabinoida i raznog bilja. Kanabinoidi su psihoaktivne supstance, dobijene iz kanabisa ili indijske konoplje.

Kostrešević je objasnio da je jedan od noviteta – droga „magični zmaj“. Ona sadrži suho egzotično bilje. Prodaje se u obliku mirisnih štapića za aromatiziranje prostorija, ali u kombinaciji sa duhanom ima narkotički učinak sličan kanabisu i stvara ovisnost.

„Navodno, od „zmaja“ konzumentima stradaju unutarnji organi, jer egzotično bilje sadrži ekstrakte otrova“, rekao je Kostrešević.

U susjednim zemljama otkrivena je nova droga, popularno nazvana „krokodil“. Ona već nakon prvog uzimanja izaziva teške

posljedice po konzumenta. Napravljena je od teških metala, benzina, crvenog fosfora i kodeina. Ova droga je jeftinija od heroina, pa je zovu „drogom za siromašne“. Uzrokuje truljenje mišićnog tkiva i propadanje jetre, a vanjska manifestacija konzumiranja je ta što koža mijenja boju u zelenu, uz pojavu gnojnih čireva. Ovisnik o „krokodilu“ može poživjeti svega od dvije do tri godine.

Kostrešević je objasnio da je jedini način spašavanja ovisnika amputiranje oboljelog organa.

Na području Federacije do sada nije zaplijenjena neka od novih droga. Ivan Trezner, načelnik Odjela za borbu protiv zloupotrebe droga u Upravi Federalne policije, kaže da postoje informacije o pojavi novih narkotika, ali do sada nije bilo zapljena. Policija nije zabilježila ni to da je neka zdravstvena institucija prijavila posljedicu po ljudsko zdravlje koja bi bila uzrokovana korištenjem tih sredstava.

Trezner kaže da se u novim sintetičkim drogama često nalaze supstance koje nisu uvrštene na listu zabranjenih supstanci u Agenciji za lijekove i medicinska sredstva BiH. Objasnio je da tako nastaju tzv. „dizajnerske droge“. Ovaj naziv se koristi kako bi se opisali narkotici koji se stvaraju tako da bi se zaobišli zakoni o drogama. Obično se u određenoj mjeri mijenja molekularna struktura već postojećih droga ili se pronalaze nove droge sa potpuno drugačijom hemijskom strukturom, dok je učinak na konzumenta skoro isti kao kod zabranjenih narkotika.

Parlamentarna skupština BiH je utvrdila listu kontrolisanih opojnih droga, psihotropnih tvari, biljaka i prekursora iz kojih se može dobiti opojna droga.

Prekursor je svaka prirodna ili umjetna tvar koja se može upotrijebiti u proizvodnji opojne droge. Ove tvari uvrštene su na listu prekursora, u skladu sa međunarodnim konvencijama o kontroli nad opojnim drogama ili na osnovu odluke nadležnog organa u BiH.

Procedura uvrštavanja nekog novog sredstva na državnu listu zabranjenih tvari traje dugo i zahtijeva niz administrativnih koraka, uz davanje stručnih obrazloženja.